

'Sëedhε 'ö Pölö -ya bɔ
 Yesu -wun -dhε 'wun gia- -mε -nu 'wo
 Filipö
 plöö -an -dhë bhë 'ö =nε

¹ Ma Pölö, 'ö yië- Timote 'yi -kë Yesu Klito -bha yuökëmε 'ka bhë, 'ö 'sëedhε =nε 'yi- bɔ -Zlan -bha mε -nu 'saadhö 'ka Filipö plöö, 'ka -klu -sü 'ka Yesu Klito -bha bhë ka -dhë. Yi- -bɔ 'pö mε 'ka -kë -Zlan -bha yuökëmε =va -nu 'ka waa- -zo -kë -Zlan -bha 'kɔ 'piö -mε -nu 'ka ka -dhë, ² -Zlan 'ö kwa Dë 'ka, waa- kwa =kɔɔnmε Yesu Klito, -wo 'glusë kë ka 'ka, -wo =zuöyagluu nu ka -dhë!

Pölö -bha =bhεa' - 'ö- wo -Zlan -bha mε -nu 'wo Filipö plöö -an -wun 'gü bhë 'ö =nε

³⁻⁵ 'Ma n -zo 'ta, -nu mε -dhë -kɔ =suu' - 'ö 'kaa- wo n -dhë -Zlan -wo =blεε' -sü 'gü 'ö goë -a zü dɔ -sü -bha 'ö yöë =dεε -bha bhë -a -wun 'gü, a -Zlan zuö -pö. =Ya kë a =bhεa' -na ka 'saadhö ka -wun 'gü, a -wo =zuögludhi 'ka. ⁶ A- =dɔa' gia- 'ka =nε, -Zlan 'ö yuö -së zü dɔ ka =zuö' 'gü bhë, -yö -dho dhoë 'dhiö -kplawo, -yaan -a 'dhiö 'to Yesu Klito -bha -yε 'zü -yi 'ka.

⁷ =Yö -së 'ka kö -zotadhe =suu' - 'ö bhë -yö kë n -gɔ, ka 'saadhö ka buëndhö. Bhii ka -dho -yö n -kë =duö. 'Ö tɔɔ 'glusë 'ö -Zlan -ya -kë n 'ka bhë, =yaa- kë mε 'plε kwa 'ka. =Dhε 'ö waa n -da -kanso 'gü -kun, a -Zlan -wo -ta -za -dɔ kö 'aan- -zɔn mε -nu -dhë =nε -Zlan -wo -yö 'wun gia- 'ka. -A -bha 'glusë bhë, -ya -kë kwa 'ka -kplawo, 'ö dho 'ö yöë ma -kë -kanso 'gü -sü 'ö =nε -a -bha. ⁸ -Dhɔ 'ö go Yesu Klito 'piö -a -wun 'gü, ka 'plε, ka -wun -yö n -gɔ 'gbee-

=duö. -Zlan -ya =dɔa' =nɛ 'ma- pö 'dhö kö 'wun gia- =nɛ 'a- =blɛɛ.

⁹ Ma =bhɛa' -wo 'ö -Zlan -dhë ka -wun 'gü 'yö =nɛ: A- -dhɛ -a -gɔ kö -Zlan -dhɔ waa- mɛ 'bhee- -nu -dhɔ 'ö ka 'gü bhë -yö =kpɛa'-, -yö 'dho 'dhiö -kplawo, 'wun -nu 'wo kpengdhö -an dɔ -sü, waa- -an -gɛn -ma kpinngdhö -sü 'ka. ¹⁰ -Yö kē 'dhö kö 'kaan- 'wun -së waa- 'wun yaa -an dɔ kö 'kaan- -a -së -zë kē. -Yö kē 'dhö kö =kun 'ö mɛ gbɛ dho 'wun yaa yö ka -bha, Klito -bha nu -yi 'ka. ¹¹ =Ya kē 'pö, 'wun kpengdhö kē -sü 'ö go Yesu Klito 'piö -yö -dho kē ka -bha -tosiadhe 'gü; kö ka kēwun -nu 'wo bhë, mɛ -nu =wa -kpɛn -a -bha, -waan -Zlan 'tɔ kē =va. 'Go mü 'zü -waan 'dhuë- 'kpɔ -a 'tɔ -bha.

Yesu 'ö tɔɔ -kē -a 'gü -sü

¹² N dhegluzë -nu, a- 'piö kö 'ka- dɔa =nɛ, 'wun 'gbee- -nu 'wo -kē n 'ka bhë yaa -Zlan -wo =gbaannu 'kɛɛ -a kē 'ö- wo 'ö dho 'dhiö =zian'. ¹³ -Kɔ bhë -a 'ka, 'ö 'yan -to -gludë -bha 'kɔ -bha -mɛ -nu 'wo zö waa- mɛ -dhɛ -nu 'wo to 'pö 'wo- =tɛi' dɔa =nɛ yuö 'a- kē -na Klito -dhë bhë -a -wun =nɛ 'wo n -da -a -dhë -kanso 'gü bhë. ¹⁴ N -ma -kē -kanso 'gü -sü bhë, -ya -kē 'ö dhegluzë -nu =plëëzë 'ö 'wo -klu -sü 'ka kwa Dëmɛ -bha 'ö -an -zo -yö -gban; 'ö 'wo -Zlan -wo =blɛɛ =faan' 'ka mɛ -nu -dhë.

¹⁵⁻¹⁷ =Ii-, -yö 'dhö! Mɛ 'bhaa -nu -wo Klito -wun -blɛɛ =gluɛng' 'ka n buëndhö, -yö kē 'dhö kö -wo mɛ -nu dɔ -gbɔudhö. Bhii 'waa Klito -wun =blɛɛ'- =zuö' 'puu 'ka; -wa -kē pē -ta =kɔɔ' -sü 'ka =zian'. N -ma -kē -kanso 'gü -sü bhë -yö -kē -an -zo 'piö =nɛ 'wa- kē 'dhö kö 'wa ma 'klobhdhe =taɔ' kē. Mɛ 'bhaa -nu -wo wo -bha Klito -wun -blɛɛ wo =zuö' 'puu 'ka. Bhii -a -gɛn 'ö tɔɔ -wo n -dhɔ -kē 'ö 'wo- =tɛi' dɔ =nɛ -Zlan =ya yuö 'ö -kē ö -wo -ta -ko zë -sü 'ka bhë =yaa- nu n -dhë.

¹⁸ 'KEE pë -nu 'wo 'dhö bhë 'waa n 'gü pë gbE 'ka. 'Kö -kë =nE -wa -kë wo =zuö' 'puu -bha oo waa- kë -a -bha oo, n 'gludhi -sü -mü; 'ö ma =zuögludhi bhë 'ö dho dho 'dhiö -kplawo, 'ö tɔɔ Klito -wun -yö =blE' -sü 'gü -kplawo. ¹⁹ Bhii a- =tEi' dɔ =nE, 'wun -nu 'wo bhë -an 'dhiötodhe -yö -dho kë -së n -ma 'ka, ka -bha -bhEa n -wun 'gü -sü waa- Yesu Klito -bha -Zuu -bha -dɔ n -gban -gɔ -sü -wun 'gü. ²⁰ Bhii a- -dɔ gia- 'ka =nE, n =dua' 'yaa -mü kö 'aan- kë =nE mE 'ö lë- dho 'kpɔ -a -ta -a 'dhö. Pë 'ö dho kë zlöö -kplawo 'ö tɔɔ: -Zo -gban -sü 'yö dho kë n -gɔ kö 'aan- Klito -bha -kë =va -sü 'tɔ bhɔ n =zuö' 'plE 'ka ma ga -sü 'iin ma -këdhösü -an 'gü. ²¹ Bhii n -ma 'ka, -këdhösü 'ö tɔɔ Klito, ga -sü 'ö tɔɔ n =truën.

²² =Ya kë =nE 'ma 'to =kun 'sia- zö, a -dho yuö -së kë; 'ö =ya kë 'zü =nE 'ma ga, a -dho n =truën yö -Zlan 'piö. 'Wun =plE 'wo bhë -wo n 'gan -na zian =plE 'ka, ²³ 'ma dɔ -a 'gü -gbɔudhö. 'KEE 'ma -dhe -ga -a 'gü 'sengdhö, -yö -dho kë -së kö 'aan- 'go 'kpongtaa kö 'aan- kë -a 'gü Klito 'piö. ²⁴ 'KEE ka -wun 'gü =yö -së =duö kö 'a -tosiadhe kë ka 'piö 'a dho -a 'ka 'dhiö.

²⁵ =Dhe 'ö -kë =nE a- =dua' 'dhö gia- wo, 'ö 'go mü 'a- =tEi' dɔ =nE a -dho dho ma -tosiadhe kë -sü 'ka 'dhiö, a -dho kë ka 'saadhö ka 'piö kö 'aan- nu ka -dhë, kö ka -bha -zo -yö -Zlan -bha -sü -yaan kë =va kö ka -bha 'gludhi -yaan 'dho 'dhiö.

²⁶ =Ya kë =nE 'ma kë -dëüwo 'zü ka 'piö, ka -dho kë 'gɔugɔ 'zü =duö n -wun 'gü Yesu Klito 'gü.

²⁷ 'Wun -nu 'wo 'dhö 'töüdhö bhë, -a -dhe 'ö 'gianzë 'ö tɔɔ kö ka =sɔɔn -yö kë -së =nE -kɔ 'ö Klito -bha 'wuntaɔsë -ya =blE' -a 'ka bhë -a 'dhö. =Ya kë 'dhö, 'kö -kë =nE a -nu ka 'piö oo, n 'ka nu oo, a- 'piö kö 'a- ma =nE ka dɔ -sü 'ka kpinngdhö, 'ö ka -bha -zotadhe 'dhö do, 'ö ka =zuö' -ya kë do -zotëndhe 'ö -Zlan -ya nu 'ö bɔ -a 'ka 'wuntaɔsë -ta -a

'gü. =Ya kë 'dhö kö 'kaan- -a -ta -ko zë 'wuntaosë yaagüme -nu 'ka.

²⁸ Kö=kun 'ka -suö mε -nu 'wo ka yaagüme -nu 'ka -Zlan -wo -wun 'gü bhë -an -dhë pë gbε -wun 'gü 'gbεdhö! Bhii =ya kë 'dhö, -yö -dho kë -an -bha =duakëpë 'ka, yö =nε 'yö dho -a -zɔn -an -dhë =nε -Zlan -dho -an 'gü =siö', 'iin kö -waan -a =dua' 'zü =nε, ka -dho dha. 'Wun -nu 'wo bhë -wo -go -Zlan 'piö. ²⁹ Bhii -Zlan =ya 'glusë kë ka 'ka; 'ka Klito -wun -dhε 'wun gia-. 'Ö 'glusë do 'ö bhë 'ö- -kë 'zü 'ö ka 'klo -yö bhɔ Klito 'tɔ -wun 'gü. ³⁰ Zlöö =nε bhë 'ka nu n -dhë kö 'kwaan- -glu gɔn -Zlan yaagüme -nu 'ka. -Glu do 'ö 'ka n yö kö a- gɔn -na 'dhiö -be, 'ö 'ka- dɔa =nε a 'dho -na -a 'ka 'dhiö -kplawo bhë, yö -mü.

2

Klito -bha ö -de =yɔɔn sia- -sü waa- -a -gɔ -bha =luu' -sü

¹ 'Go ka -bha -klu Klito -bha -yi -bha 'ö yöë =dεε -bha, Klito -yö ka =faan' -më, 'ö- -bha -dhɔ bhë 'ö ka 'yënnε =dhuë'. 'Go mü 'zü 'ö 'ka -klu -sü 'ka -Zlan -bha -Zuu 'slööslö -bha. 'Ö 'ka- -dhɔ -kë ka 'kuë 'ö 'ka ka 'ko -nu 'yena -yö wo.

² =Dhε -kë 'dhö, a- -dhε ka -gɔ, kö 'ka n =zuö' 'glu dhi ö 'plε 'ka, ka -wo -kë do -sü, ka -bha -dhɔ -kë 'kuë -sü, ka -bha =zuö' -kë do -sü waa- ka -bha -zotadhe -kë do -sü -an 'plε 'ka. ³ Kö=kun 'ka pë gbε -kë pë -ta =kɔɔ' -sü waa- -de -sü =va -sü -an 'ka! -Ka ka -de 'sü 'tee ka 'ko -nu -dhë! Mε 'ö -dhö -yö mε 'wo to -yö -an 'sü 'gianzë ö -de -bha! ⁴ Kö =kun 'ö mε gbε -yö ö -de 'sloo ö =truën =mεε, 'kεε -ka ka -zo 'ta 'pö, mε -nu 'wo to -an -wun 'gü!

⁵ Ka -bha 'wun kë -kɔ -nu 'ö do do 'ka ka 'ko 'piö, -yö bhɔ Yesu Klito -bha 'wun kë -kɔ -bha, 'ö tɔɔ: ⁶ Kö -yaan =tun nu -sü -bha 'kpongtaa, -kɔ do 'ö -Zlan 'dhoë- 'ka bhë =nε 'ö- 'ka 'pö. 'Kεε yaa =mεε' kö waa- -Zlan 'wo -mɔ wo 'kuë. ⁷ Pë 'ö- -kë =zian' 'ö tɔɔ: -Yö ö -kwaa ö -bha pë -nu

'plɛ -wun -zü, 'ö ö -de -kë =nua 'ka. 'Go mü 'zü 'ö ö -de -kë =nɛ mɛ 'bhee- 'dhö. -A -bha -kë mɛ 'bhee- 'ka -sü bhë, ⁸ -yö -we -a -bha 'ö ö -de =yɔɔn sia-, 'ö -kë 'wun -ma -Zlan -ta -mɛ 'ka ö këwun 'saadhö 'gü, 'ö -we -a -bha kö mɛ -nu -waan zë. Ga 'ö- wo 'dhö bhë yaa kë ga 'kpaan 'ka 'kɛɛ -yö -kë -ga -gaatalü -bha -sü 'ö ga lëzë 'ka bhë -a 'ka. ⁹ Pë 'ö -kë 'ö -Zlan -ya bho ga 'gü 'ö- =luu dhang- 'gü, 'ö- -ya 'gɔ -gbloo 'gü 'ö- gbaa 'tɔ 'ö 'gianzë 'ö =zië' 'tɔ 'plɛ -ta -a 'ka bhë 'ö bhë. ¹⁰ =Ya kë 'dhö kö 'të -pë 'saadhö 'wo dhang- -nu 'gü, 'wo 'sɛ -ta, 'wo 'sɛ =löö, kö -wo wo -gɔ =yɔɔ- 'Yesu 'dhiö -a =bhlë 'kpɔ -sü 'ka, ¹¹ kö -an 'plɛ -waan pö -a Dë -Zlan 'tɔ bho -sü 'ka, -dhɛ 'saadhö -a 'gü =nɛ: Yi =kɔɔnmɛ 'ö tɔɔ Yesu Klito.

-Ka kë 'kpongtaamɛ -nu -bha -dhɛpuudhɛ 'ka

¹² N dhegluzë -nu, =dhɛ -kë =nɛ ka 'wun -ma -Zlan -ta -kplawo bhë, kö ka -bha dhasü bhë, -kaa 'gü -yuö kë -süë -Zlan -dhë -sü 'ka =nɛ pë 'wo- pö -a -bha a ka 'piö ma -a 'dhö; -a -de -yö ziö mü 'kö -kë =nɛ 'maa 'ma 'dhee.

¹³ Bhii -Zlan -yö yuö -kë -kplawo ka =zuö' 'gü. Yuö 'ö 'dhö bhë 'ö tɔɔ -a -dhi -a -dhë -wun -nu kë -sü bhë -a -dho -da ka 'gü -sü waa- =faan' nu ka -dhë -sü kö ka -kɔ -yaan -mɔ 'wun -nu 'wo 'dhö bhë -an kë -sü -bha.

¹⁴ Kö =kun 'ka 'wun gbɛ -kë -wokpɔdhe waa- =zuöto- zlöödhɛ -an 'ka! ¹⁵ -Yö kë 'dhö, 'kaan- kë -Zlan -bha 'në -nu 'wo kpengdhö 'ö 'wun =zaa' -sü gbɛ 'yaa -an -bha, 'ö =sɔɔn yaa gbɛ 'yaa -an =zuö' 'piö -an 'ka. -Tosiadhe -së 'ö 'dhö bhë, ka -dho -a kë mɛ -nu 'wo 'kpongtaa =dɛɛ -yi =nɛ -a 'gü 'ö 'waa kpengdhö 'ö 'wo këpëyaamɛ -nu 'ka -an ziën. -Kɔ do bhë -a 'ka 'ö 'ka dho -dhɛ po këpëyaamɛ -nu 'wo bhë -an ziën =nɛ 'gbia -nu -bha -dhɛ 'po -sü 'ö -dhetiidhɛ 'gü -a 'dhö, ¹⁶ -wo 'ö =toëpö -kë -a 'gü -sü nu mɛ -nu -dhë bhë -a -zɔn -an -dhë -sü 'ka. 'Ö =ya kë =nɛ, 'ka- kë 'dhö, a -dho -mɔ -a -bha kö 'aan- kë 'gɔugɔ ka -wun 'gü Klito

-bha nu -yi 'ka. Bhii kö =yaa- zɔn n -dhë =nɛ n -ma yuö -nu waa- =saan' -nu 'a- wo ka 'piö bhë waa 'to 'kpaan.

¹⁷ Ka -bha -zo -yö -Zlan -bha -sü =tɛi' -yö kē =nɛ sla- bho -Zlan -dhë -sü 'dhö. 'Ö -de 'ö -kē =nɛ a -to -kanso 'gü 'ö 'wo n zë, 'yaa n 'gü pē gbɛ 'ka. N -ma ga -sü 'ö bhë -yö -dho kē ka -bha sla- 'yoo -bho sia- -pē 'ka. 'Ö =ya kē =nɛ, -kɔ 'ö 'a- =blɛɛ -a 'ka bhë =ya kē -a 'ka 'dhö, n =zuö' 'glu -dho dhi -a -wun 'gü. 'Ö kwa 'plɛ 'kwa dho n -ma =zuögludhi bhë -a kē kwa 'ko =bhaa. ¹⁸ -Kɔ do bhë -a 'ka 'pö, ka =zuö' 'glu -yö dhi kö 'kaan- kpa n -ma 'kwaan- -a kē kwa 'ko =bhaa.

Polö -bha naɔ -wun 'ö -gban Timote waa- Epafloditö -an -bha, -a =blɛɛ' -sü

¹⁹ 'Ö =ya kē =nɛ kwa Dëmɛ Yesu =ya 'we -a -bha, a -dho Timote bɔ ka 'piö, dɔ 'ö 'kwa- wo =nɛ -a 'gü, kö -a -bha -yɛ 'zü -sü 'ka, n =faan' -yaan 'më, 'wuntaɔsë 'ö dho goë ka 'piö bhë -a -wun 'gü. ²⁰ Yö dosɛn 'kpaan =nɛ 'ö =ya kē 'ö nu n -dhë, yuö 'a- kē -na kwa Dëmɛ Yesu -dhë bhë -a 'gü. 'Go mü 'zü 'ö -ya ka -wun =zɔnng' -ta giagiawo. ²¹ Mɛ -nu 'ö 'wo to 'waa wo -zo 'ta pē -nu 'ö 'wo dho Yesu Klito 'gbloo 'piö -an -wun 'gü, 'kɛɛ -an -de -bha pē -nu dosɛn =nɛ 'ö 'wo wo -zo -ta -an -wun 'gü. ²² Timote -bha -kē kpengdhö -sü 'ö ö -de -zɔn -a 'ka bhë, ka gia- -de, 'ka- =tɛi' dɔ. Bhii -yö -nu n -dhë, yuö 'ö -kē 'wuntaɔsë =blɛɛ' -sü 'ka mɛ -nu -dhë bhë -a 'gü =nɛ -kɔ 'ö 'në waa- ö dë 'wo yuö kē -na -a 'ka wo 'kuë- bhë -a 'dhö. ²³ =Ya kē =nɛ pē 'ö dho kē n 'ka -kanso 'gü zö, 'ma -dhɛ yö -a 'gü, a -dho to mü 'a- bɔ ka -dhë. ²⁴ -Yö n 'gü =nɛ kwa Dëmɛ dho -a kē kö 'aan- nu -wo =dhia ka 'piö, dɔ 'kwa- wo =nɛ -a 'gü.

²⁵ Kwa dheglu Epafloditö 'ö 'ka- bɔ n 'piö 'ö nu n -dhë -Zlan -bha yuö waa- -a -bha -glu gɔn -sü 'gü, 'ö pē 'ö n -ma -wun -yö yö -a -bha, 'ka- dɔ -a -gɔ 'ö nuë n -dhia bhë, a -yö -së kö 'aan- -a bɔ ka 'piö 'zü. ²⁶ -A ma 'ö- wo =nɛ, ka -da

'yena 'gü ö -bha 'yua -wun 'gü bhë, -a =zuö' -yö -to zlöö; -a 'siö -de -yö kpa -na -a -ta kö -yaan nu ka 'saadhö ka 'piö kö -yaan ka =zuö' wɔ sia-. ²⁷ 'Yua -ya -kë 'dhö! 'Ö -töng ga -sü 'ka =klöö'. 'ΚΕΕ -Zlan -ya 'yena -yö, 'ö- dha 'yua bhë -a -gɔ. Ma -de 'pö, -Zlan -yö n 'yena -yö -a -bha 'yua bhë -a 'gü. Bhii 'ö tɔɔ =ya kë =nɛ, -yö -kë -a -bha -dhekpacyi 'dhiötöyi 'ka -be, -a 'wun bhë -yö -dho n -ma 'yena =taɔ' kë. 'ΚΕΕ -Zlan yaa 'we -a -bha kö 'wun 'ö 'dhö -yaan kë n 'ka. ²⁸ 'Wun -nu 'wo 'dhö 'töüdhö bhë -a -wun 'gü, 'siö -yö kpa -na n -ta kö 'aan- -a bɔ ka -dhë kö 'ka ka 'yan dɔ -a -bha, kö ka =zuö' 'glu 'yaan- dhi -dëüwo 'zü, kö ma -de 'pö n =zuö' -yö =waannu. ²⁹ =Dhɛ -kë 'dhö bhë, =ya nu ka 'piö 'ma, -kaa -nia 'kun =zuögludhi 'ka =nɛ -kɔ 'ö 'ka dho ka dheglu mɛ -nu 'wo kwa Dëmɛ 'gü -an -nia kuën bhë -a 'dhö. Mɛ -nu 'ö 'wo -kë =nɛ Epafloeditö 'dhö bhë, -ka -an -bhlë -ya =va 'ka! ³⁰ Bhii -yö -yö ga -sü 'ka =klöö' Klito -bha yuö -wun 'gü. 'Ö tɔɔ pë 'ö ka -kɔ yaa -mɔ -a -bha kö 'ka-kë n -dhë bhë, yö -zë 'pö, -ya -kë.

3

'Wun 'ö -gban -kë kpengdhö -kɔ giagia 'ö -dhö -Zlan wö 'dhiö -a =blɛɛ'- 'ö Pɔlö -ya wo

¹ N dhegluzë -nu, ka =zuö' 'glu -yö dhi kwa Dëmɛ 'gü! 'Yaa n -gɔ 'gügasüzë kö 'wun -nu 'ö 'a -an =blɛɛ ka -dhë 'dhiö -be bhë, 'aan- bɔ -a 'gü 'zü 'sëedhɛ 'gü, bhii a- =dɔa' =nɛ -yö -dho ka -zo -büö kö -yö ka -ya 'yaan, kö =kun 'ö 'ka dho to mɛ -nu -püö -mɛ -nu -wo 'piö kö 'kaan- -püö. ² -Zlan -bha yuö -kë yaa -mɛ -nu 'ö 'wo mɛ -nu -püö -na bhë, -ka ka -de kë -an -gɔ 'slë 'ka! Bhii -yö -kë -an -zo 'piö =nɛ, -go 'bɔng -sü =nɛ 'ö dho -an kë -Zlan -bha 'në -nu 'ka. ³ 'ΚΕΕ kwa =nɛ 'ö 'kwa tɔɔ -Zlan -bha 'në kpinngdhö, 'waa -mü? Bhii kwa -Zlan -gba -a -bha -Zuu -bha 'piigbeedhɛ

=kwaä'. 'Go mü 'zü 'ö 'kwa Yesu Klito 'tɔ -kë =va, pë -nu 'ö- -kë kwa -dhë bhë -a -wun 'gü; 'ö 'kwaä kwa -zo yö mɛ 'bhee- wɔ -kɔ -dhë.

⁴ 'Ö =ya kë -be =nɛ, -zo -yö mɛ 'bhee- wɔ -kɔ -bha -sü bhë -yö -mɔ -a -bha kö -yaan mɛ 'bhee- kë -Zlan -bha 'nä 'ka -be, kö ma =nɛ 'ö n -ma kun -be. ⁵ Bhii 'ö tɔɔ =dhe 'a bhɔ, -a -dhekpawyi -yö -kë 'slɛaga, 'ö 'a dho 'bɔn =nɛ -kɔ 'ö kwa -bha tɔng 'dhö -a 'ka bhë -a 'dhö. Izlaelö 'nä giagia -mü n 'ka, 'ö 'a go Bɛnzamɛ -gɔ 'gunng 'gü. Eblö 'nä giagia -mü n 'ka. -A -dhe 'ö -gban Zuifö -nu wɔ -kɔ -bha 'ö -kë kwa -bha tɔng 'ö -Zlan -ya nu Moizö -dhë -a 'kun -sü 'ka bhë, a- 'gü 'gbee- 'pö, 'ö tɔɔ Falizi -mɛ -nu, 'ö 'wo -kë tɔng 'ö 'dhö bhë -a 'kun -sü 'gü kpinngdhö bhë, -a mɛ do 'ka. ⁶ Tɔng 'ö 'dhö bhë, a- -kun =faan' 'ka, 'ö 'a dhoë 'dhö, 'a Yesu Klito -wun -dhe 'wun gia- -mɛ -nu 'klo bhɔ. 'Go mü 'zü, -a -dhe 'ö -gban -tosiadhe -kë kpengdhö -sü 'ö tɔng 'gü =zian', mɛ gbɛ 'yaa -mɔ -a -bha kö -yö za dɔ n -ma. ⁷ Pë -nu 'wo bhë, a -an -ga -be =nɛ pë 'ö- =truën dho -kë -dhö -a 'dhö, 'kɛɛ Klito -wun 'gü, 'ma -an -ga zlöö, -wo -kë n 'gü =nɛ pë 'flëë 'ö- -yö -a -bha -pë gbɛ 'yaa 'dhö -a 'dhö. ⁸ Pë -nu 'ö 'wo 'dhö bhë, wo -de 'sloo 'waa -mü 'ö 'wo -kë n -dhë pë 'flëë 'ka; 'kɛɛ pë -nu 'saadhö 'ö 'wo n -gɔ a -an -ga =nɛ -kɔ do bhë -a 'dhö, 'ö tɔɔ n Dëmɛ Yesu Klito dɔ -sü -yö 'gianzë 'ö =zië' pë 'saadhö 'wo to bhë -an -ta. Yesu Klito 'ö bhë -a -wun 'gü, 'yö 'a -we -a -bha 'a n -kɔ bho pë 'saadhö -wun 'gü, 'ö 'a -an -ga =nɛ 'dunnngtaapë 'dhö, -yö kë 'dhö kö Yesu Klito -yaan kë n =truën 'ka. ⁹ A- 'piö kö 'aan- -klu Yesu Klito -bha kpinngdhö. 'Maa n -zo 'ta gbɔ =nɛ n -ma 'wun -ma Zuifö -nu -bha tɔng -ta -sü =nɛ 'ö- -kë 'a -kë kpengdhö, 'kɛɛ -zo -yö Klito -bha -sü =nɛ 'ö- -kë 'ö 'a -kë kpengdhö -Zlan wö 'dhiö. -Kë kpengdhö -sü 'ö bhë -yö -go -Zlan 'piö 'ö =ya kë 'ö- nu Klito -wun -dhe 'wun gia- -mɛ -dhë.

¹⁰ Pë dosɛn 'kpaan 'ö 'a- 'piö 'ö tɔɔ kö 'aan- Klito dɔ. 'Go mü 'zü kö 'aan- -Zlan -bha 'piigbeedɛ 'ö- bho ga 'gü bhë kö 'a- dɔ 'pö. A- 'piö kö 'aan- -da -a -bha =sëëbhodhe 'gü kö 'a kë =nɛ -a 'dhö, -a -bha ga -sü 'gü. ¹¹ =Ya kë 'dhö, kö =ya kë =nɛ 'ma ga, 'aan- go ga 'gü bun =suu' - 'ö -kë Klito -gɔ 'ö goë ga 'gü bhë -a 'ka.

-Bla 'sü -sü 'ö 'wo dhoë 'ö 'wo =loë' -a 'dhiötodhe -bha

¹² N 'ka- pö =nɛ -bla 'a- 'sü -na bhë 'ma -lo -a 'dhiötodhe -bha, 'iin 'ma kë kpengdhö 'saadhö; 'kɛɛ a- -pö =zian' =nɛɛ, a 'dho -na 'dhiö -bla 'sü -sü 'ka -kplawo; 'a n 'gü dɔ -na 'gbee- kö 'aan- n =saan' yö, bhii Yesu Klito =ya n 'sü ö -bha 'ka 'saadhö.

¹³ N dhegluzë -nu, a- -pö ka -dhë 'zü -dëüwo =nɛ, 'yaa n ma -zotadhe 'gü =nɛ 'ma n =saan' yö 'saadhö 'kɛɛ pë 'a- kë -na 'ö tɔɔ: Pë -nu 'saadhö 'wo n =zlöö bhë, a n -zo bho -na -an 'piö, 'ö 'a n 'gü dɔ -na 'gbee- kö -a -dhë 'ö n 'dhiö bhë 'aan- yö -a -bha. ¹⁴ -Kɔ 'ö 'a -bla 'sü -na -a 'ka kö 'aan- -lo -a 'dhiötodhe -bha kö =saan' 'ö =toëpö -këdhösü 'ka dhang- 'gü, 'ö -Zlan -yö bɔa Yesu Klito 'gü 'ö kwa =dhɔɔ kë -na -a 'ka bhë kö 'aan- n -ma yö bhë 'ö bhë.

¹⁵ Mɛ -nu 'ö 'kwa -kian -Zlan -wo 'gü bhë, =yö -së kö -zotadhe =suu' - 'a- =blɛɛ ka -dhë bhë -yö kë kwa -gɔ. 'Ö =ya kë =nɛ mɛ 'bhaa -nu -wo ka ziën 'ö -zotadhe 'ö bhë 'yaa -an -gɔ, -Zlan -dho -a -bho 'kou kë -an -dhë 'papadhö.

¹⁶ -A mɛ 'ö 'gianzë 'ö tɔɔ zian 'ö 'kwa- sü 'dhiö 'ö 'kwa =tun -a -ta =nɛ kö 'kwa 'ta 'sü -a -ta -kplawo, 'kwa dhoë 'dhiö.

¹⁷ N dhegluzë -nu, -ka 'wun kë -kɔ 'sü n -ma, 'ka- 'sü 'pö n -ma -to n 'piö -mɛ -nu -bha! 'Ka mɛ -nu 'ö 'wo wo -bha -tosiadhe kë -na =nɛ -kɔ 'ö 'yi- zɔn -a 'ka -an -dhë -a 'dhö, -ka -an -ga kö 'ka ka -bha kë 'dhö 'pö! ¹⁸ 'Wun mɛ 'ö nu -na =nɛ =ya kë a- -blɛɛ ka -dhë -kplawo. A bɔ -na -a 'piö 'zü -dëüwo 'a- -blɛɛ' -na ka -dhë 'gbo 'ka =nɛ: Mɛ =plëëzë -nu -wo ka 'piö, 'ö -an -bha -tosiadhe kë -kɔ -yö -kë =nɛ

mε -nu 'ö 'wo Klito -bha -ga -gaatalü -bha -wun bhë 'wo-yaagümε -nu 'ka -an 'dhö. ¹⁹ Mε -nu 'wo 'dhö bhë, -an -bhöpë -yö -an -gɔ =nε -an -bha -zlan 'dhö. 'Ö pë -nu 'ö-lë- dho -an kë -be bhë, 'ö 'wo wo -de sü -a 'gü =va =zian'. 'Wun -nu =ya kë 'ö 'wo wo -zo -ta -a 'gü 'ö tɔɔ 'kpongtaa -wun dosεn. -A mε -nu 'ö 'wo 'dhö bhë, -an 'dhiö -dho to -an 'gü =siö' -sü -ta. ²⁰ Mε -nu 'ö 'kwa kwa -bha -tosiadhe kë =nε -an 'dhö bhë, kwa =nε 'ö 'kwa tɔɔ dhang- -nu 'gü 'në -nu, 'ö 'kwa -ya -sü 'ka kwa Dhamε 'ö kwa Dëmε Yesu Klito 'ka bhë -a -bha -go dhang- 'gü -yi -gɔ. ²¹ Yi 'ö dho nuë 'kpongtaa zö, -yö -dho ö bha 'piigbeedhe 'ö -mɔ -a -bha kö -yaan pë 'saadhö 'gblü -a 'dhiö bhë -a sü kö -yaan kwa 'kpongtaa -bun 'yenazë 'ö =nε -a 'gla -a 'ka kö -yaan -a kë =nε ö bun 'bhü -sü 'ö bhë -a 'dhö.

4

Pɔlö -bha Filipö -mε -nu =kpaɔ 'ö- wo

¹ N dheglu -nu, -kɔ 'a- =blεε -a 'ka bhë, 'ka dho dɔ -a 'ka gεnngdhö ka -bha -zo -yö -Zlan -bha -sü 'gü, -klu kwa Dëmε -bha -sü 'ka. =Dhe 'ö =ya kë 'dhö, a- 'piö 'sönggö -sönggö kö 'aan- n 'yan dɔ ka 'ö 'ka n =zuö' 'glu dhi -na =duö 'ö 'ka n -ma yuö =truën 'ka bhë ka -bha.

² Evodi kaa- Sεntisö, a -bhεa ka -dhë 'sönggö -sönggö kö ka =zuö' -yaan kë do =nε 'ta -sü kwa Dëmε 'piö -mε -nu =zuö' 'dhö.

³ Bhi -de 'pö, n 'bhamε 'ö yuö do 'a- kë -na =nε 'ü- kë -na 'pö -së 'ka bhë, a- -dhe ü -gɔ kö dhoo -nu =plε 'wo bhë 'ü 'dho -an -dhë kö -waan 'wun ma wo 'ko -ta. Bhii dhoo -nu =plε 'wo bhë oo, Klema oo, 'iin n -ma yuökëyɔɔ -nu 'töüdhö 'ö -Zlan =ya -an 'tɔ -ya =toëpö -këdhösü 'sëedhe -be 'gü bhë, -wo -nu n -dhë 'ö 'yi 'wuntaɔsë -ta -ko zë, 'wuntaɔsë bhë -a =blεε' -sü 'ka mε -nu 'saadhö -dhë kö -yaan 'dho 'dhiö.

⁴ Ka =zuö' 'glu -yö dhi -kplawo kwa Dëmε 'gü! A- -pö ka -dhë 'zü =nεε: Ka =zuö' 'glu -yö dhi! ⁵ -Ka kē 'lëälë mε 'saadhö buëndhö, bhii kwa Dëmε nu -yi 'yaa =gbiin gbɔ!
⁶ Kö =kun 'ka -ya pē gbε =zɔnng' -ta, 'kεε pē 'töüdhö 'ö ka -bha -wun -yö yö -a -bha yi 'oo yi 'ka, -kaa -dhε -Zlan -gɔ -bhεa -a -dhë -sü =zuö' 'plε 'ka waa- -a zuö pö -sü 'ka!

⁷ =Ya kē 'dhö, -Zlan -bha =zuöyagluu 'ö =va 'ö =zië' mε 'bhee- -bha 'wundɔdhe 'saadhö -ta bhë, -yö -dho -a kē kö ka =zuö' waa- ka -bha -zotadhe -yaan 'to Yesu Klito -bha zian -ta.

⁸ N dhegluzë -nu, pē 'a dho -a pö ka -dhë 'zü 'ö tɔɔ: Ka -bha -zotadhe -yö 'dho pē 'ö 'wun gia- 'ka, pē 'ö =bhlë 'kpɔ -pē 'ka, pē 'ö kpengdhö, pē 'ö 'puu, pē 'ö -dhɔ =kaa' -pē 'ka, pē 'ö 'gianzë, pē 'ö -së, pē 'ö- 'tɔ bhɔ -sü 'dhö -së -an 'piö =zian'. ⁹ Pē -nu 'ö 'ka -an =daan 'ö 'ka -an yö n 'piö, pē -nu 'ö 'ka -an ma n 'dhii waa- pē -nu 'ö 'ka n yö -an kē =dhia bhë, pē -nu 'wo bhë 'saadhö, -ka -an kē! =Ya kē 'dhö -Zlan 'ö =zuöyagluu nu kwa -dhë bhë -yö -dho kē ka 'piö.

Pɔlö -bha Filipö -mε -nu zuö pö -sü gbaɔ 'wo- -kë -a -dhë bhë -a -wun 'gü

¹⁰ N =zuö' 'glu -yö -dhi =duö kwa Dëmε 'gü, bhii 'ö tɔɔ 'töng =plëézë 'ö -ziö bhë, ka -yε 'zü -dëüwo, 'ka ka -bha -dhɔ -zɔn n -dhë, -nu n -dhë -sü 'ka. 'Kö -kë =nε -a -dhε -yö =glɔɔ kaa nu n -dhë 'siö-, a- =tɛi' dɔ =nε kaa ka bo -ya n -wun =zɔnng' -ta -sü 'ka, 'kεε -a kē -kɔ 'slë yaa kē -dhö ka -gɔ bhë yö -mü. ¹¹ 'Wun 'a- =blεε bhë, yaa kē =nε n -ma -wun 'ö yö pē 'bhaa -bha, bhii -tosiadhe kē -sü 'ö =zuögludhi 'ka, pē 'ö mε -gɔ 'iin 'yaa mε -gɔ -a -wun 'gü bhë, 'ma- =daan'. ¹² -Tosiadhe kē -sü 'ö 'fεε 'gü waa- -a kē -sü 'ö =bhɔɔ' 'gü, a -an 'plε këdhε -dɔ. 'Ö -kë =nε -bhöpë -yö n -gɔ 'iin 'yaa n -gɔ, 'iin 'zü pē 'dhö n -gɔ =va 'ö -lö n -zü oo, 'iin -yö n -gɔ 'tee 'ö yaa -mɔ n -ma oo, 'ma- 'plε kē -kɔ =daan!'; 'ö n 'glu -yö -dhi -a 'plε -wun 'gü, -dhε

'saadhö 'gü 'töng 'plε 'ka. ¹³ Pë -nu 'wo 'dhö 'töüdhö bhë, n -kɔ -yö -mɔ -an 'plε kē -sü -bha 'gügbeedhε 'ö Klito 'dhö -a nu -na n -dhë bhë -a =kwaä'.

¹⁴ =li-, a- =blεε 'dhö 'kεε nu 'ka- wo n -dhë n -ma 'wun 'gbee- 'gü bhë, ka- -kē -së. ¹⁵ Filipö -mε -nu, ka gia- -de ka- =tεi' dɔ =nε 'töng 'a go -a 'ka ka -gɔ Maseduanë -sε 'gü kö 'ma -Zlan -wo =blεε' -sü zü dɔ, Yesu -wun -dhε 'wun gia- -mε -nu -dho 'kuë- -sü -nu 'ö 'wo -dhö 'töüdhö bhë, ka do 'kpaan =nε 'ö =ya kē 'ka pē -nu bɔ n -dhë. ¹⁶ Kö 'a =tun Tesalɔnikö, pē -nu 'ö n -ma -wun -yö yö -a -bha, ka -an -bɔ n -dhë -gwaa =plëezë 'ka 'dhö. ¹⁷ Kεε, kö =kun 'ö -kē ka -zo 'piö =nε pē 'ö 'a- 'piö 'ö tɔɔ kö 'kaan- gbaɔ kē n -dhë -kplawo. 'Kεε 'a- 'piö =zian' kö pē -nu 'ö 'ka- kē -na n -dhë -kplawo bhë, -an =truën -nu -waan kē -dhö ka -bha 'ka, 'iin kö -yö -da 'kuë- dhö, kö -yö kē =va -Zlan 'piö. ¹⁸ Pë -nu 'töüdhö 'ö 'ka- dɔ Epafloeditö -gɔ 'ö nuë n -dhia bhë, -a 'plε -yö -lo n -ta. -Yö -mɔ n -ma 'ö- 'bhaa -yö to. 'ö dɔ 'ö 'kwa- wo zlöö =nε -a 'gü, pē -nu 'ö n -ma -wun -yö yö -a -bha 'dhiö -be bhë, 'ö- 'plε =ya kē n -gɔ zlöö =va 'ka. Ka -bha gbaɔ 'ö 'ka- -kē n -dhë bhë, -yö 'wun -së 'ö- -wun 'yi -yö -kan -Zlan 'dhi, 'ö -we -a -wun -bha -a 'ka; ¹⁹ (n -kɔ 'yaa -mɔ -a -bha kö 'a- -yε 'zü kē ka -dhë; 'kεε) pē 'töüdhö 'ö ka -bha -wun -yö yö -a -bha, n ma -Zlan -bha -kē =bhɔɔzë -sü =duö bhë -a -wun 'gü, -yö -dho bɔ Yesu Klito 'gü 'ö- nu ka -dhë.

²⁰ Kwa Dë -Zlan 'ö bhë -a 'tɔ -yö kē =va -kplawo -yö dhoë 'dhiö. Amεn.

=Wekadhe

²¹⁻²² -Zlan -bha mε -nu 'töüdhö, 'ö 'ka -klu -sü 'ka Yesu Klito -bha 'ö 'ka Filipö plöö, 'ma 'we kaa! Ka dhegluzë -nu 'wo kwa Dëmε 'gü 'ö yi -nu 'yi yi 'ko 'piö 'nö waa- -Zlan -bha mε -nu 'wo to 'saadhö 'wo 'nö, =wa 'we kaa! -Zlan -bha mε -nu mε 'ö 'wo -gludë Sezaa -gɔ kɔɔ, =wa 'we

Filipö 4:23

13

Filipö 4:23

kaa =duö. ²³ Kwa Dëmε Yesu Klito -bha 'dhuë- -yö 'to ka
'saadhö ka 'piö!

'WUN SĚ -NAŌ 'SĚĚDHĚ

Dan: 'WUN SĚ -NAŌ 'SĚĚDHĚ New Testament

copyright © 1991 Wycliffe Bible Translators, Inc.

Language: Dan

Dialect: Western

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 1 Jun 2022

74f67de7-5f93-5988-92e9-b1a45247636e